

D.R. 37/95

Naskhah Sahih—Bahasa Kebangsaan

RANG UNDANG-UNDANG STANDARD MALAYSIA 1995

SUSUNAN FASAL

BAHAGIAN I

PERMULAAN

Fasal

1. Tajuk ringkas, pemakaian dan mula berkuatkuasa.
2. Tafsiran.

BAHAGIAN II

PELETAKHAKAN HARTA, DSB., PADA SYARIKAT PENGGANTI

3. Peletakhakan.
4. Pegangan permulaan Kerajaan dalam syarikat pengganti.
5. Pelaburan Kerajaan dalam penerbitan selanjutnya syer syarikat pengganti.
6. Kakitangan.
7. Kerajaan Malaysia hendaklah memegang semua syer dalam syarikat pengganti.
8. Menteri Kewangan hendaklah memegang syer.

BAHAGIAN III

KETUA PENGARAH JABATAN STANDARD

9. Perlantikan Ketua Pengarah.
10. Kewajipan dan fungsi Ketua Pengarah.
11. Kuasa untuk mewakilkan.
12. Kuasa Menteri untuk memberikan arahan.

BAHAGIAN IV

PENUBUHAN MAJLIS STANDARD DAN AKREDITASI

Fasal

13. Penubuhan Majlis Standard dan Akreditasi dan fungsinya.
14. Jawatankuasa.

BAHAGIAN V

STANDARD

15. Penentuan standard.
16. Perakuan akreditasi dan pendaftaran.
17. Sekatan atas penggunaan perkataan.
18. Kesalahan pelbagai.
19. Kesalahan yang dilakukan oleh pertubuhan perbadanan.
20. Ciri-ciri komoditi, dsb., boleh ditetapkan dengan merujuk kepada penentuan standard.
21. Sebutan dan bukti penentuan.

BAHAGIAN VI

AM

22. Peraturan-peraturan.

BAHAGIAN VII

PEMANSUHAN DAN PERUNTUKAN PERALIHAN

23. Pemansuhan dan kecualian.
24. Penerusan prosiding jenayah dan sivil.
25. Kecualian bagi penentuan, tanda dan lesen.
26. Pencegahan anomali.

RANG UNDANG-UNDANG

b e r n a m a

Suatu Akta untuk membuat peruntukan baru dalam undang-undang yang berhubungan dengan standard dan bagi perkara lain yang berkaitan dengannya.

[]

MAKA INILAH DIPERBUAT UNDANG-UNDANG oleh Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti berikut:

BAHAGIAN I

PERMULAAN

1. (1) Akta ini bolehlah dinamakan Akta Standard Malaysia 1995 dan hendaklah terpakai di seluruh Malaysia. Tajuk ringkas, pemakaian dan mula berkuatkuasa.

(2) Akta ini hendaklah mula berkuatkuasa pada tarikh yang ditetapkan oleh Menteri melalui pemberitahuan dalam *Warta*; dan Menteri boleh menetapkan tarikh yang berlainan bagi mula berkuatkuasanya peruntukan yang berlainan dalam Akta ini.

2. Dalam Akta ini, melainkan jika konteksnya menghendaki makna yang lain— Tafsiran.

"akreditasi" ertinya suatu prosedur yang melaluinya badan yang berkuasa memberikan pengiktirafan formal bahawa sesuatu badan atau seseorang adalah kompeten untuk menjalankan tugas tertentu;

"hak" ertinya segala hak, kuasa, keistimewaan dan kekebalan, sama ada sebenar, kontingen atau prospektif;

"harta" termasuklah—

- (a) segala harta alih dan tak alih dan segala kepentingan, hak dan liabiliti, sama ada di sisi ekuiti atau undang-undang dalam, kepada atau daripada harta itu, hak dalam tindakan, pelaburan, wang dan nama baik; dan
- (b) segala hak dan liabiliti berkenaan dengan kontrak yang berhubungan dengan pembinaan bangunan,

dan "terletakhak", berhubungan dengan harta, termasuklah hak kepada harta yang masa hadapan atau kontingen;

Akta 157

"Institut" ertinya Institut Standard dan Penyelidikan Perindustrian Malaysia yang ditubuhkan di bawah Akta Institut Standard dan Penyelidikan Perindustrian Malaysia (Perbadanan) 1975;

"Ketua Pengarah" ertinya Ketua Pengarah Jabatan Standard yang dilantik di bawah seksyen 9;

"komoditi" ertinya apa-apa artikel, keluaran atau benda yang menjadi perkara tred atau perdagangan;

"liabiliti" ertinya tiap-tiap jenis liabiliti, hutang, tanggungan, kewajipan, dan obligasi (sama ada masa kini atau masa hadapan, sebenar atau kontingen, dan sama ada kena dibayar atau dipatuhi atau dilaksanakan di Malaysia atau di tempat lain);

"Majlis" ertinya Majlis Standard dan Akreditasi Malaysia yang ditubuhkan di bawah subseksyen 13(1);

"Menteri" ertinya Menteri yang pada masa ini dipertanggungkan dengan tanggungjawab bagi standard;

"pemerakuan" ertinya suatu prosedur yang melaluinya pihak ketiga yang dilantik oleh Ketua Pengarah memberikan jaminan bertulis bahawa sesuatu komoditi,

proses, amalan atau perkhidmatan menepati kehendak tertentu; dan "pihak ketiga", berhubungan dengan pemerakuan, ertinya sesuatu badan atau seseorang yang diiktiraf sebagai berasingan daripada pihak yang terlibat mengenai isu yang berkenaan;

"pendaftaran" ertinya suatu prosedur yang melaluinya sesuatu badan yang dilantik oleh Ketua Pengarah menunjukkan ciri-ciri yang relevan mengenai sesuatu komoditi, proses, amalan atau perkhidmatan atau butir-butir sesuatu badan atau seseorang, dalam senarai yang sesuai, yang boleh didapati oleh orang awam;

"penentuan" ertinya perihalan sesuatu komoditi, proses, amalan atau perkhidmatan dengan merujuk kepada jenisnya, kualitinya, kekuatannya, ketulenannya, komposisinya, kuantitinya, dimensinya, beratnya, grednya, kebolehtahanannya, asalnya, usianya atau ciri-ciri lain atau perihalan sesuatu komoditi dengan merujuk kepada apa-apa tanda atau label pada komoditi itu, dan termasuk daftar istilah, sesuatu takrif, sesuatu simbol, dan sesuatu amalan yang disyorkan;

"penentuan standard" ertinya sesuatu penentuan yang telah diisytiharkan sebagai suatu penentuan standard menurut seksyen 15;

"penentuan standard sementara" ertinya sesuatu penentuan standard yang belum melalui prosedur biasa pertimbangtelitian jawatankuasa teknikal dan komen awam dan—

- (a) yang pada pendapat Majlis diperlukan segera; atau
- (b) yang berkenaan dengannya Menteri berpendapat bahawa penggunaannya secara cubaan adalah perlu sebelum ia boleh dimuktamadkan;

"penilaian ketepatan" ertinya apa-apa aktiviti mengenai menentukan, secara langsung atau tak langsung, bahawa kehendak yang relevan dipenuhi;

"penstandardan" ertinya aktiviti menetapkan, mengenai masalah sebenar atau berpotensi, peruntukan bagi kegunaan biasa dan berulang, dengan tujuan mencapai tahap optimum keteraturan dalam sesuatu konteks yang diberikan;

"peraturan-peraturan" ertinya peraturan-peraturan yang dibuat di bawah seksyen 22;

"standard" ertinya sesuatu dokumen yang diluluskan oleh suatu badan yang diiktiraf, yang mengadakan peruntukan, bagi kegunaan biasa dan berulang, kaedah-kaedah, garis panduan atau ciri-ciri bagi keluaran atau proses dan kaedah pengeluaran yang berkaitan, yang pematuhannya adalah tidak mandatori; dan yang boleh juga termasuk atau memperkatakan semata-mata mengenai kehendak peristilahan, simbol, pembungkusan, penandaan atau pelabelan sebagaimana yang ia terpakai bagi sesuatu keluaran, proses atau kaedah pengeluaran;

Akta 125.

"syarikat pengganti" ertinya syarikat yang terhad oleh syer yang diperbadankan di bawah Akta Syarikat 1965 dan yang dinamakan oleh Menteri dalam perintah di bawah subseksyen 3(1) yang kepadanya harta, hak, liabiliti dan fungsi Institut dipindahkan dan terletak di bawah subseksyen 3(1);

"tanda" termasuklah apa-apa peranti, jenama, tajuk, label, tiket, nama, tandatangan, perkataan, huruf, angka, dan apa-apa kombinasinya;

"tanda ketepatan" ertinya tanda terpelihara, yang dipakai atau dikeluarkan di bawah kaedah-kaedah sesuatu sistem pemerakuan, yang menunjukkan bahawa keyakinan yang memadai diberikan bahawa komoditi, proses, amalan atau perkhidmatan yang relevan itu menepati standard yang tertentu atau dokumen normatif yang lain;

Akta 175.

"tanda standard" ertinya sesuatu tanda yang didaftarkan di bawah Akta Cap Dagangan 1976 sebagai cap dagangan perakuan;

"tarikh peletakhakan" ertinya tarikh bila segala harta, hak, liabiliti dan fungsi Institut dipindahkan kepada atau terletak pada syarikat pengganti sebagaimana yang ditentukan oleh Menteri dalam perintah di bawah subseksyen 3(1).

BAHAGIAN II

PELETAKHAKAN HARTA, DSB., PADA SYARIKAT PENGGANTI

3. (1) Menteri boleh, melalui perintah yang disiarkan Peletakhakan. dalam *Warta*, menetapkan suatu tarikh peletakhakan dan pada tarikh itu, segala harta, kecuali tanah yang disebut dalam subseksyen (2), hak, liabiliti dan fungsi Institut hendaklah, menurut kuasa Akta ini, dipindahkan kepada dan terletak pada syarikat pengganti tanpa apa-apa jua pemindahhakan, penyerahhakan atau pemindahan.

(2) Mana-mana tanah yang dipegang atas nama Pesuruhjaya Tanah Persekutuan dan yang sebelum sahaja tarikh peletakhakan diduduki oleh Institut hendaklah terus diduduki oleh syarikat pengganti di bawah suatu pajakan pada sewa dan atas apa-apa terma yang dipersetujui oleh Pesuruhjaya Tanah Persekutuan dan syarikat pengganti.

(3) Walau apa pun subseksyen (1), hanya fungsi Institut yang di bawah Akta ini tidak terletak pada Ketua Pengarah dan mana-mana badan lain boleh dipindahkan kepada syarikat pengganti.

(4) Tiap-tiap harta yang terletak menurut kuasa subseksyen (1) pada syarikat pengganti hendaklah terletak sedemikian pada syarikat itu bagi hakmilik atau kepentingan yang serupa sebagaimana ia terletak atau dipegang sebelum sahaja tarikh peletakhakan itu.

(5) Tiap-tiap hak dalam tindakan yang terletak menurut kuasa subseksyen (1) pada syarikat pengganti boleh, selepas tarikh peletakhakan itu, dituntut melalui guaman, didapatkan atau dikuatkuasakan oleh syarikat itu atas namanya sendiri dan tidaklah perlu bagi syarikat

itu atau Institut memberikan notis kepada orang yang terikat dengan hak dalam tindakan itu mengenai peletakhakan yang dilaksanakan melalui subseksyen (1).

(6) Tiap-tiap hak dan liabiliti yang terletak melalui subseksyen (1) pada syarikat pengganti boleh, pada atau selepas tarikh peletakhakan itu, dituntut melalui guaman, didapatkan atau dikuatkuasakan oleh atau terhadap syarikat itu atas namanya sendiri dan tidaklah perlu bagi syarikat itu atau Institut memberikan notis kepada orang yang hak dan liabilitinya tersentuh oleh peletakhakan di bawah subseksyen (1).

(7) Apa-apa prosiding undang-undang yang belum selesai oleh atau terhadap Institut yang berhubungan dengan mana-mana harta, hak dan liabiliti yang berpindah kepada dan terletak pada syarikat pengganti menurut kuasa subseksyen (1) boleh, pada atau selepas tarikh peletakhakan itu, diteruskan oleh atau terhadap syarikat pengganti itu.

(8) Dalam hal hak dan liabiliti yang berbangkit di bawah mana-mana pinjaman yang terletak pada syarikat pengganti pada tarikh peletakhakan, syarikat itu boleh membuat apa-apa perkiraan atau perjanjian mengenai hak dan liabiliti sedemikian dengan Kerajaan Malaysia atau mana-mana pihak ketiga.

(9) Pada atau selepas tarikh peletakhakan, apa-apa perjanjian yang berhubungan dengan mana-mana harta, hak dan liabiliti yang berpindah kepada dan terletak pada syarikat pengganti di bawah subseksyen (1) yang Institut ialah pihak kepadanya sebelum sahaja tarikh peletakhakan itu, sama ada secara bertulis atau tidak, dan sama ada atau tidak daripada jenis yang hak dan liabiliti di bawahnya boleh diserahkan oleh Institut, hendaklah berkuatkuasa seolah-olah syarikat itu telah menjadi suatu pihak kepada perjanjian itu.

(10) Walau apa pun subseksyen (9), mana-mana perjanjian yang dibuat oleh Institut, yang hal perkaranya berhubungan dengan apa-apa perkara yang termasuk dalam kuasa dan fungsi Ketua Pengarah di bawah Akta ini, hendaklah, pada tarikh peletakhakan diturunkan kepada Kerajaan dan hendaklah berkuatkuasa seolah-olah Kerajaan telah menjadi suatu pihak kepada perjanjian itu.

(11) Jika menurut kuasa subseksyen (1), apa-apa harta berpindah kepada dan terletak pada syarikat pengganti, peruntukan dalam Bahagian Tiga Puluh Kanun Tanah Negara hendaklah, bagi maksud melaksanakan pendaftaran peletakhakan sedemikian, terpakai bagi syarikat pengganti, seolah-olah ia adalah pihak berkuasa awam. *Akta 56/65*

4. (1) Berbangkit daripada peletakhakan pada syarikat pengganti akan harta, hak dan liabiliti di bawah subseksyen 3(1), syarikat pengganti itu hendaklah menerbitkan apa-apa sekuriti syarikat sebagaimana yang diarahkan oleh Menteri Kewangan, dari semasa ke semasa, selepas berunding dengan Menteri. *Pegangan permulaan Kerajaan dalam syarikat pengganti.*

(2) Sekuriti yang dikehendaki diterbitkan menurut seksyen ini hendaklah diterbitkan atau diumpukkan pada bila-bila masa dan atas apa-apa terma, tentang pengumpulan, sebagaimana yang diarahkan oleh Menteri Kewangan selepas berunding dengan Menteri.

(3) Sekuriti di bawah seksyen ini—

(a) hendaklah daripada apa-apa nilai nominal sebagaimana yang diarahkan oleh Menteri Kewangan; dan

(b) hendaklah diterbitkan sebagai berbayar penuh dan dikira bagi maksud Akta Syarikat 1965 *Akta 125.* seolah-olah ia telah dibayar menurut kuasa pembayaran nilai nominalnya kepada syarikat pengganti.

(4) Apa-apa dividen atau jumlah wang lain yang diterima oleh Menteri Kewangan menurut kuasa seksyen ini hendaklah dibayar ke dalam Kumpulan Wang Disatukan.

Pelaburan
Kerajaan
dalam
penerbitan
selanjutnya
syer syarikat
pengganti.

5. (1) Penerbitan selanjutnya syer syarikat pengganti hanya boleh dibuat sebagaimana yang diarahkan oleh Menteri Kewangan, dari semasa ke semasa, selepas berunding dengan Menteri.

Akta 61

(2) Apa-apa perbelanjaan yang dilakukan oleh Menteri Kewangan berikutan dengan peruntukan seksyen ini hendaklah dikira sebagai pelaburan dan dibenarkan di bawah subperenggan 8(3)(a)(iv) Akta Prosedur Kewangan 1957.

(3) Apa-apa dividen atau jumlah wang lain yang diterima oleh Menteri Kewangan di bawah seksyen ini hendaklah dibayar ke dalam Kumpulan Wang Disatukan.

(4) Duti setem tidak boleh dikenakan berkenaan dengan apa-apa pertambahan modal syarikat pengganti yang—

(a) dilaksanakan melalui penerbitan syer; dan

(b) diperakui oleh Perbendaharaan sebagai dilaksanakan melalui penerbitan syer yang dipohon beli oleh Menteri Kewangan di bawah subseksyen (1).

Kakitangan.

6. (1) Syarikat pengganti hendaklah menyetujui terima untuk mengambil kerja, pada suatu tarikh yang ditetapkan oleh Menteri melalui pemberitahuan dalam *Warta*, tiap-tiap orang yang sebelum sahaja tarikh itu ialah anggota kakitangan Institut dan yang telah diberikan suatu pilihan oleh Institut dan telah memilih untuk berkhidmat sebagai pekerja syarikat itu.

(2) Tiap-tiap orang sedemikian yang memilih di bawah subseksyen (1) untuk berkhidmat sebagai pekerja syarikat pengganti hendaklah diambil kerja oleh syarikat itu atas terma-terma dan syarat-syarat perkhidmatan yang tidak kurang baiknya daripada terma-terma dan syarat-syarat perkhidmatan yang dia berhak kepadanya sebelum sahaja tarikh yang ditetapkan.

7. (1) Menteri Kewangan boleh, dari semasa ke semasa, bagi pihak Kerajaan Malaysia, memohon beli atau selainnya memperolehi semua syer dalam syarikat pengganti.

Kerajaan Malaysia hendaklah memegang semua syer dalam syarikat pengganti.

(2) Syer dalam syarikat pengganti yang dipegang oleh Menteri Kewangan hendaklah dipegang oleh Menteri Kewangan Diperbadankan di bawah Akta Menteri Kewangan (Pemerbadanan) 1957.

Akta 375

(3) Walau apa pun mana-mana undang-undang bertulis yang lain atau kaedah undang-undang, adalah tidak perlu melengkapkan atau mendaftarkan sesuatu pemindahan syer daripada jenis yang disebut dalam subseksyen (2) berikutan dengan pertukaran orang yang memegang jawatan Menteri Kewangan.

(4) Menteri Kewangan boleh menjalankan segala hak dan kuasa yang berhubung kait dengan syer dalam syarikat pengganti yang dipegang olehnya.

(5) Menteri Kewangan boleh, pada bila-bila masa, melalui notis bertulis kepada Setiausaha Syarikat bagi syarikat pengganti, memberikuasa, atas apa-apa terma dan syarat yang ditentukan dalam notis itu, mana-mana orang yang difikirkannya patut untuk bertindak sebagai wakilnya pada mana-mana atau semua mesyuarat pemegang syer syarikat pengganti atau mana-mana kelas pemegang syer, dan mana-mana orang yang diberikuasa sedemikian adalah berhak menjalankan kuasa yang sama, bagi pihak Menteri Kewangan, sebagaimana yang Menteri Kewangan boleh menjalankannya jika hadir sendiri pada mesyuarat atau mesyuarat-mesyuarat itu.

8. (1) Menteri Kewangan tidaklah boleh—

(a) menjual atau selainnya melupuskan mana-mana syer dalam syarikat pengganti yang dipegang olehnya kepada mana-mana orang; atau

(b) membenarkan syer dalam syarikat pengganti diumpukkan kepada mana-mana orang.

Menteri Kewangan hendaklah memegang syer.

(2) Tiada apa-apa jua dalam subseksyen (1) adalah terpakai bagi syer keutamaan boleh tebus yang—

- (a) tidak boleh ditukar kepada syer daripada mana-mana kelas yang lain; dan
- (b) tidak memberikan apa-apa hak mengundi pada mana-mana mesyuarat agung syarikat pengganti.

BAHAGIAN III

KETUA PENGARAH JABATAN STANDARD

Perlantikan
Ketua
Pengarah.

9. (1) Menteri hendaklah, dari semasa ke semasa, melalui pemberitahuan dalam *Warta*, melantik seorang pegawai awam untuk menjadi Ketua Pengarah Jabatan Standard bagi maksud menjalankan kewajipan dan fungsi yang diberikan kepadanya di bawah Akta ini.

(2) Ketua Pengarah hendaklah memegang jawatan bagi apa-apa tempoh dan tertakluk kepada apa-apa syarat yang ditentukan oleh Menteri selepas berunding dengan Suruhanjaya Perkhidmatan Awam.

(3) Ketua Pengarah hendaklah mempunyai meterai rasmi yang hendaklah disiarkan dalam *Warta* bagi pengesahan dokumen yang dikehendaki bagi maksud kewajipan dan fungsinya di bawah Akta ini.

Kewajipan
dan fungsi
Ketua
Pengarah.

10. (1) Kewajipan dan fungsi Ketua Pengarah adalah untuk menggalakkan dan memajukan standard dan penstandardan penentuan sebagai cara memajukan ekonomi negara, memanfaatkan kesihatan, keselamatan dan kebajikan awam, membantu dan melindungi pengguna, memajukan kecekapan dan pembangunan industri, memudahkan perdagangan dalam negeri dan antarabangsa dan melanjutkan kerjasama antarabangsa berhubungan dengan standard,

(2) Pada menunaikan kewajipan dan fungsinya di bawah subseksyen (1), Ketua Pengarah boleh—

- (a) melantik agensi kebangsaan tunggal untuk menyelaraskan aktiviti pembangunan standard

di Malaysia dengan tujuan membangunkan standard dan kod umum dan untuk mewakili Malaysia dalam aktiviti penstandardan antarabangsa;

- (b) menggalakkan kerjasama antara organisasi yang terlibat dalam penstandardan sukarela di Malaysia dan jabatan dan agensi Kerajaan bagi maksud mencapai keserasian, dan penggunaan umum yang maksimum bagi, standard dan kod;
- (c) melaksanakan kriteria dan prosedur berhubung dengan penyediaan, pelulusan, penerimaan dan penetapan standard di Malaysia sebagaimana yang diluluskan oleh Menteri;
- (d) mengesyorkan standard yang dikemukakan oleh agensi kebangsaan tunggal yang dilantik di bawah perenggan (a) sebagai standard kebangsaan, jika sesuai, dan menyenggarakan indeks standard yang diluluskan;
- (e) mengumpul, menterjemah dan menyebarkan maklumat mengenai standard dan aktiviti penstandardan di dalam dan di luar Malaysia;
- (f) menggalakkan penggunaan standard yang diluluskan oleh Menteri;
- (g) mengesyorkan kepada Menteri supaya diterima pakai mana-mana penentuan antarabangsa atau luar negeri, dengan atau tanpa ubahsuaian, sebagaimana yang sesuai bagi kegunaan di Malaysia;
- (h) mengakreditasikan, mengikut kriteria dan prosedur yang diluluskan oleh Menteri, organisasi di Malaysia yang terlibat dalam penilaian ketepatan dan menyenggarakan suatu daftar organisasi yang diakreditasikan dan tanda ketepatan mereka;
- (i) melantik organisasi-organisasi sebagai ejen untuk mengadakan perkhidmatan penilaian bagi pengakreditasian dan pendaftaran yang diperuntukkan di bawah Akta ini;

RANG UNDANG-UNDANG

- (j) mengakreditasikan makmal pengujian, makmal penentukuran dan organisasi latihan yang terlibat dalam melatih kakitangan dalam penilaian ketepatan;
- (k) mendaftarkan, mengikut kriteria dan prosedur yang diluluskan oleh Menteri, orang yang terlibat dalam perkhidmatan penilaian ketepatan, seperti perundingan dan pengauditan, dan menyenggarakan suatu daftar orang berkelayakan;
- Akta 175. (l) menetapkan dan mendaftarkan di bawah Akta Cap Dagangan 1976, tanda akreditasi Jabatan Standard sendiri;
- (m) membenarkan dan mengawalselia penggunaan mana-mana tanda akreditasi yang disebut di bawah perenggan (7);
- (n) bekerjasama dengan Kerajaan Negeri, pihak berkuasa tempatan, sektor perindustrian, komersil dan tred dan mana-mana organisasi lain yang ditentukannya dengan tujuan memastikan standard diterima pakai;
- (o) menggalakkan, dengan kerjasama organisasi Malaysia yang terlibat dalam pembentukan, pengujian, pemerakuan dan pengakreditasi standard secara sukarela, perkiraan kerjasama dengan organisasi yang terlibat seumpamanya di negara-negara lain bagi pertukaran maklumat;
- (p) menasihati Menteri tentang keperluan, sumber dan penguntukan sumber kewangan kepada organisasi Malaysia yang terlibat dalam penstandardan sukarela untuk membantu mereka memenuhi kehendak kebangsaan dan antarabangsa;
- (q) menjalinkan dan mengekalkan hubungan dengan organisasi tempatan dan luar negeri yang terlibat dalam penstandardan dan perkara berkaitan yang lain dalam sektor awam dan swasta, dan mengekalkan pendedahan terhadap keperluan perindustrian dalam penstandardan; dan

(r) melaksanakan apa-apa fungsi lain yang dikehendaki oleh Menteri,

11. (1) Ketua Pengarah boleh, secara bertulis, mewakili kepada mana-mana pegawai awam, tertakluk kepada apa-apa syarat, had atau sekatan yang difikirkannya patut dikenakan, mana-mana kewajipannya atau fungsinya di bawah Akta ini. Kuasa untuk mewakilkan.

(2) Apa-apa perwakilan yang dibuat di bawah seksyen ini tidaklah mencegah Ketua Pengarah itu sendiri daripada melaksanakan kewajipan atau menjalankan fungsi yang diwakilkan sedemikian.

12. Menteri boleh, dari semasa ke semasa, memberikan arahan kepada Ketua Pengarah yang tidak tak konsisten dengan peruntukan Akta ini dan Ketua Pengarah hendaklah melaksanakan segala arahan sedemikian. Kuasa Menteri untuk memberikan arahan.

BAHAGIAN IV

PENUBUHAN MAJLIS STANDARD DAN AKREDITASI

13. (1) Maka hendaklah ditubuhkan suatu Majlis yang akan dikenali sebagai Majlis Standard dan Akreditasi Malaysia yang terdiri daripada anggota yang berikut yang dilantik oleh Menteri: Penubuhan Majlis Standard dan Akreditasi dan fungsinya.

- (a) seorang Pengerusi;
- (b) seorang Timbalan Pengerusi;
- (c) seorang wakil syarikat pengganti;
- (d) lima orang wakil Kerajaan; dan
- (e) tidak lebih daripada tujuh orang anggota lain yang, pada pendapat Menteri, mempunyai pengalaman yang luas atau pengetahuan khusus dalam perkara yang berhubungan dengan fungsi, kuasa dan aktiviti Majlis.

(2) Ketua Pengarah hendaklah menjadi seorang anggota *ex officio* Majlis.

(3) Tertakluk kepada arahan dan kawalan Menteri, kewajipan Majlis adalah—

- (a) untuk menasihati Menteri berkenaan dengan dasar, program, skim, projek dan aktiviti penstandardan;
- (b) untuk menasihati, dan mengemukakan syor bagi pertimbangan dan kelulusan, Menteri berkenaan dengan program, skim, projek dan aktiviti untuk memajukan kecekapan dan pembangunan perindustrian, dan bagi perlindungan pengguna, melalui aktiviti penstandardan;
- (c) untuk menasihati Menteri berkenaan dengan penentuan standard bagi komoditi, proses, amalan dan perkhidmatan;
- (d) untuk menasihati Menteri mengenai keutamaan berkenaan dengan penstandardan untuk memastikan keberkesanan yang maksimum;
- (e) untuk menasihati Menteri mengenai pelaksanaan berkesan penentuan standard bagi komoditi, proses, amalan dan perkhidmatan;
- (f) untuk mengemukakan bagi pertimbangan dan kelulusan Menteri, kriteria dan prosedur yang berhubungan dengan penyediaan, pelulusan, penerimaan dan penetapan standard sukarela di Malaysia;
- (g) untuk mengemukakan bagi pertimbangan dan kelulusan Menteri, kriteria dan prosedur yang berhubungan dengan pengakreditasi makmal pengujian, makmal penentukuran, organisasi yang terlibat dalam penilaian ketepatan dan organisasi yang terlibat dalam melatih kakitangan dalam penilaian ketepatan;
- (h) untuk mengemukakan bagi pertimbangan dan kelulusan Menteri, kriteria dan prosedur bagi pendaftaran orang yang terlibat dalam penilaian ketepatan;
- (i) untuk menasihati Menteri mengenai penganjuran dan pelaksanaan program akreditasi;

- (j) untuk menasihati, dan mengemukakan syor bagi pertimbangan dan kelulusan, Menteri berkenaan dengan program, skim, projek dan aktiviti untuk memajukan keperluan pengujian perindustrian dan bagi pembangunan perkhidmatan pengujian;
- (k) untuk melaksanakan apa-apa fungsi lain yang ditentukan atau diwakilkan oleh Menteri.

(4) Seseorang anggota Majlis hendaklah, melainkan jika dia meletakkan atau mengosongkan jawatannya terlebih dahulu atau perlantikannya dibatalkan terlebih dahulu, memegang jawatan bagi tempoh tiga tahun dan adalah layak dilantik semula bagi apa-apa tempoh berturut-turut yang tidak melebihi tiga tahun.

(5) Sekiranya Pengerusi tidak ada atau tidak dapat bertindak kerana sakit atau apa-apa sebab lain atau jika jawatan Pengerusi itu kosong, Timbalan Pengerusi hendaklah menjalankan kewajipan dan fungsi Pengerusi.

14. Walau apa pun seksyen 13, Majlis boleh, tertakluk kepada kelulusan Menteri terlebih dahulu, menubuhkan apa-apa jawatankuasa yang difikirkannya perlu bagi menunaikan kewajipannya atau fungsinya, atau bagi apa-apa maksud yang berbangkit daripada atau yang berkaitan dengan mana-mana kewajipannya atau fungsinya. Jawatankuasa.

BAHAGIAN V

STANDARD

15. (1) Menteri boleh, melalui pemberitahuan dalam *Warta*, mengisytiharkan mana-mana penentuan yang telah diterima pakai dengan atau tanpa ubahsuaian, sebagai suatu penentuan standard atau suatu penentuan standard sementara bagi maksud Akta ini, dan boleh meminda atau menarik balik mana-mana penentuan standard atau penentuan standard sementara. Penentuan standard.

(2) Jika sesuatu penentuan telah diisytiharkan sebagai suatu penentuan standard sementara, ungkapan "Sementara" atau "S" hendaklah dimasukkan ke dalam tajuk atau nombor penentuan standard itu.

(3) Tiada penentuan boleh diisytiharkan sebagai penentuan standard, dan tiada penentuan standard boleh dipinda atau ditarik balik, melainkan jika Menteri berpuas hati bahawa orang yang mungkin tersentuh oleh perisytiharan, pindaan atau penarikbalikan itu telah mendapat peluang untuk menimbangkannya dan memberikan ulasan mengenainya kepada Menteri atau kepada Majlis atau kepada sesuatu jawatankuasa Majlis yang diberikuasa:

Dengan syarat bahawa subseksyen ini tidak terpakai bagi penentuan standard sementara.

(4) Perisytiharan, pindaan atau penarikbalikan sesuatu penentuan standard hendaklah dibuat mengikut cara yang ditetapkan oleh peraturan-peraturan atau, jika tiada peraturan sedemikian dibuat, mengikut apa-apa cara yang ditentukan oleh Menteri.

(5) Menteri hendaklah menyebabkan hakikat perisytiharan, pindaan atau penarikbalikan itu, tetapi bukan teks penentuan yang diisytiharkan, dipinda atau ditarik balik itu, dan tarikh ia berkuatkuasa, diberitahu dalam *Warta*.

(6) Tanpa bukti yang sebaliknya—

(a) suatu pemberitahuan dalam *Warta* di bawah subseksyen (5) hendaklah menjadi keterangan yang mencukupi mengenai perkara yang dinyatakan dalamnya; dan

(b) hakikat bahawa sesuatu penentuan telah diisytiharkan sebagai suatu penentuan standard atau bahawa sesuatu penentuan standard telah dipinda atau ditarik balik hendaklah menjadi keterangan yang mencukupi bahawa kehendak seksyen ini telah dipatuhi.

Perakuan
akreditasi
dan
pendaftaran.

16. (1) Mana-mana orang atau organisasi yang ingin diakreditasi atau didaftarkan sebagai—

(a) suatu organisasi penilaian ketepatan;

(b) suatu makmal bagi pengujian atau penentukuran;

- (c) suatu organisasi latihan bagi penilaian ketepatan; atau
- (d) orang yang layak melaksanakan penilaian ketepatan dan perkhidmatan yang berkaitan,

boleh memohon kepada Ketua Pengarah mengikut apa-cara yang ditetapkan oleh peraturan-peraturan.

(2) Jika Ketua Pengarah berpuas hati, atas permohonan yang dibuat di bawah subseksyen (1), bahawa badan, makmal, organisasi latihan, atau orang, yang disebut dalam subseksyen (1) patut diakreditasikan atau didaftarkan, dia boleh memberikan suatu perakuan akreditasi atau pendaftaran kepada pemohon tertakluk kepada apa-apa terma dan syarat, jika ada, yang ditetapkan oleh peraturan-peraturan.

(3) Sesuatu perakuan akreditasi atau pendaftaran di bawah seksyen ini hendaklah diberikari bagi sesuatu tempoh yang ditentukan oleh Ketua Pengarah tetapi selagi terma-terma dan syarat-syarat perakuan akreditasi atau pendaftaran itu dipatuhi, perakuan akreditasi atau pendaftaran itu boleh dari semasa ke semasa diperbaharui oleh Ketua Pengarah bagi apa-apa tempoh yang ditentukan olehnya.

(4) Tiap-tiap orang yang memohon untuk mendapatkan perakuan akreditasi atau pendaftaran di bawah seksyen ini dan tiap-tiap orang yang kepadanya perakuan akreditasi atau pendaftaran diberikan sedemikian hendaklah, jika dia pada, bila-bila masa dikehendaki berbuat sedemikian oleh Ketua Pengarah, mengemukakan—

- (a) bagi penilaian atau pemeriksaan, segala dokumen;
- (b) apa-apa maklumat,

yang berhubungan dengan pengendalian yang berkenaan dengannya perakuan akreditasi atau pendaftaran itu dipohon atau telah diberikan.

(5) Apabila apa-apa dokumen telah dikemukakan bagi penilaian atau pemeriksaan di bawah seksyen ini, maka hendaklah kena dibayar kepada Ketua Pengarah oleh pemohon atau pemegang perakuan akreditasi atau pendaftaran itu kos penilaian atau pemeriksaan yang semunasabahnya dan apa-apa kos lain yang mungkin semunasabahnya dilakukan berkaitan dengan penilaian atau pemeriksaan itu.

(6) Ketua Pengarah hendaklah menyimpan suatu daftar yang dalamnya hendaklah direkodkan perincian tiap-tiap perakuan akreditasi atau pendaftaran yang diberikan di bawah seksyen ini dan yang hendaklah, pada bila-bila masa yang munasabah, terbuka untuk pemeriksaan oleh orang awam di Jabatan Standard.

(7) Ketua Pengarah boleh pada bila-bila masa menggantung atau membatalkan sesuatu perakuan akreditasi atau pendaftaran yang diberikan di bawah seksyen ini jika, pada pendapatnya, mana-mana terma dan syarat yang berhubung kait dengan perakuan akreditasi atau pendaftaran itu telah dimungkiri, tetapi seseorang pemegang perakuan akreditasi atau pendaftaran yang perakuan akreditasinya atau perakuan pendaftarannya telah digantung atau dibatalkan oleh Ketua Pengarah boleh merayu kepada Menteri dan keputusan Menteri adalah muktamad.

Sekatan atas
penggunaan
perkataan.

17. (1) Kecuali dengan persetujuan Menteri, tiada kumpulan orang, diperbadankan atau selainnya, boleh menjalankan fungsi yang baginya ia dibentuk di bawah suatu nama yang mengandungi perkataan "Standard Malaysia" atau apa-apa singkatannya atau apa-apa singkatannya yang mengelirukan atau apa-apa tanda Jabatan Standard atau apa-apa tanda yang menyerupainya.

(2) Jika mana-mana undang-undang bertulis mengadakan peruntukan bagi pendaftaran mana-mana kumpulan orang, pihak berkuasa pendaftaran boleh enggan mendaftarkan jika pada pendapatnya penggunaan nama yang dengannya kumpulan orang itu ingin didaftarkan adalah dilarang di bawah subseksyen (1).

(3) Seksyen ini hendaklah, dengan ubahsuaian yang perlu, terpakai bagi orang perseorangan yang menjalankan perniagaan di bawah apa-apa nama atau gelaran selain daripada nama dan gelarannya sendiri.

(4) Mana-mana kumpulan orang atau mana-mana orang yang melakukan apa-apa tindakan melanggar dengan seksyen ini adalah melakukan suatu kesalahan melainkan jika dibuktikan bahawa tindakan itu tidak dilakukan untuk mendapatkan keuntungan atau dengan niat hendak menipu, dan apabila disabitkan boleh didenda tidak melebihi lima puluh ribu ringgit.

18. (1) Mana-mana orang yang—

Kesalahan
pelbagai

- (a) membuat apa-apa pernyataan atau representasi, sama ada secara bertulis atau selainnya, atau menggunakan apa-apa tanda dengan merujuk kepada apa-apa komoditi, proses, amalan atau perkhidmatan yang memberikan atau mungkin memberikan tanggapan bahawa seseorang yang tidak didaftarkan atau diperakui untuk menggunakan sesuatu tanda ketepatan dengan merujuk kepada komoditi, proses, amalan atau perkhidmatan itu adalah didaftarkan atau diperakui sedemikian atau selainnya adalah berhak menggunakan sesuatu tanda ketepatan;
- (b) membuat apa-apa pernyataan atau representasi, sama ada secara bertulis atau selainnya, atau menggunakan apa-apa tanda yang memberikan atau mungkin memberikan tanggapan bahawa sesuatu komoditi, proses, amalan atau perkhidmatan mematuhi suatu penentuan standard sedangkan ia tidak mematuhi sedemikian;
- (c) setelah didaftarkan atau diperakui untuk menggunakan sesuatu tanda ketepatan, menggunakan tanda ketepatan itu selepas pembatalan atau semasa penggantungan perakuan pendaftaran atau akreditasinya atau selain daripada mengikut terma-terma dan syarat-syarat perakuan pendaftaran atau akreditasinya itu;

- (d) membuat apa-apa pernyataan atau representasi, sama ada secara bertulis atau selainnya, dengan merujuk kepada apa-apa komoditi, proses, amalan atau perkhidmatan yang memberikan atau mungkin memberikan tanggapan bahawa seseorang yang tidak diakreditasi di bawah Akta ini dengan merujuk kepada komoditi, proses, amalan atau perkhidmatan itu adalah diakreditasi sedemikian;
- (e) membuat apa-apa pernyataan atau representasi, sama ada secara bertulis atau selainnya, yang memberikan atau mungkin memberikan tanggapan bahawa sesuatu komoditi, proses, amalan atau perkhidmatan mematuhi kehendak akreditasi sedangkan ia tidak mematuhi sedemikian; atau
- (f) setelah didaftarkan atau diakreditasi, menggunakan perakuan pendaftaran atau akreditasi selepas pembatalannya, atau semasa penggantungannya, atau selain daripada mengikut terma-terma dan syarat-syarat perakuan pendaftaran atau akreditasi itu,

adalah melakukan suatu kesalahan dan apabila disabitkan boleh didenda tidak melebihi satu ratus ribu ringgit dan, dalam hal kesalahan yang berterusan, boleh dikenakan denda tambahan tidak melebihi satu ribu ringgit bagi tiap-tiap hari kesalahan itu diteruskan.

Kesalahan yang dilakukan oleh pertubuhan perbadanan.

19. Jika suatu kesalahan terhadap Akta ini telah dilakukan oleh suatu pertubuhan perbadanan, mana-mana orang yang pada masa kesalahan itu dilakukan ialah seorang pengarah, pengurus, setiausaha atau pegawai lain yang seumpamanya dalam pertubuhan perbadanan itu, atau yang berupa sebagai bertindak atas sifat sedemikian, hendaklah disifatkan telah melakukan kesalahan itu melainkan jika dia membuktikan bahawa kesalahan itu dilakukan tanpa persetujuan atau pembiarannya dan bahawa dia telah menjalankan segala usaha wajar untuk mencegah pelakuan kesalahan itu sebagaimana yang sepatutnya telah dijalankan olehnya memandangkan jenis fungsinya atas sifat itu dan memandangkan segala hal keadaan.

20. Jika mana-mana undang-undang bertulis memberikan kuasa untuk menetapkan atau menentukan, sama ada melalui perundangan subsidiari atau selainnya, apa-apa ciri bagi apa-apa komoditi, proses, amalan atau perkhidmatan, maka ciri-ciri itu atau mana-mana daripadanya boleh ditetapkan atau ditentukan dengan merujuk kepada mana-mana penentuan standard atau bahagiannya.

Ciri-cin komoditi, dsb., boleh ditetapkan dengan merujuk kepada penentuan standard.

21. Dalam mana-mana undang-undang bertulis, sesuatu penentuan standard boleh, tanpa menjejaskan apa-apa cara sebutan yang lain, disebut mengikut tajuk atau nombor yang diberikan kepadanya oleh Menteri; dan apa-apa sebutan itu hendaklah, melainkan jika konteksnya menghendaki makna yang lain, disifatkan merujuk kepada penentuan standard itu sebagaimana yang berkuatkuasa pada masa undang-undang itu dibuat.

Sebutan dan bukti penentuan.

BAHAGIAN VI

AM

22. (1) Menteri boleh membuat apa-apa peraturan yang suaimanfaat atau perlu bagi melaksanakan maksud Akta ini.

Peraturan-peraturan.

(2) Tanpa menjejaskan keluasan subseksyen (1), Menteri boleh membuat peraturan-peraturan bagi atau mengenai segala atau mana-mana perkara yang berikut:

- (a) menetapkan cara penentuan boleh diisytiharkan sebagai penentuan standard;
- (b) mengawalselia pengisytiharan penentuan standard;
- (c) mengadakan peruntukan bagi pindaan atau penarikbalikan mana-mana penentuan standard atau penentuan standard sementara dan mengawalselia prosedur yang berhubungan dengannya;
- (d) menetapkan cara perakuan akreditasi atau pendaftaran boleh diberikan;

- (e) mengawalselia pengeluaran perakuan akreditasi, menetapkan terma-terma dan syarat-syarat yang atasnya atau tertakluk kepadanya perakuan akreditasi boleh dikeluarkan, dan mengawalselia pembaharuan, penggantungan atau pembatalan perakuan akreditasi dan prosedur bagi merayu terhadap penggantungan atau pembatalan itu;
- (f) mengawalselia pengeluaran perakuan pendaftaran, menetapkan terma-terma dan syarat-syarat yang atasnya atau tertakluk kepadanya perakuan pendaftaran boleh dikeluarkan, dan mengawalselia pembaharuan, penggantungan atau pembatalan perakuan pendaftaran, dan prosedur bagi merayu terhadap penggantungan atau pembatalan itu;
- (g) menetapkan kaedah untuk membuktikan adanya atau tidak adanya terma-terma dan syarat-syarat bagi mana-mana perakuan akreditasi atau pendaftaran yang diberikan di bawah Akta ini;
- (h) menetapkan borang-borang bagi maksud Akta ini;
- (i) menetapkan perkara yang berkenaan dengannya fee kena dibayar di bawah Akta ini atau di bawah peraturan-peraturan, amaun fee, dan orang yang bertanggung membayarnya;
- (j) menetapkan prosedur yang hendaklah diikuti pada mesyuarat Majlis.

BAHAGIAN VII

PEMANSUHAN DAN PERUNTUKAN PERALIHAN

Pemasuhan
dan
kecualian.
Akta 157

23. (1) Akta Institut Standard dan Penyelidikan Perindustrian Malaysia (Perbadanan) 1975 adalah dimansuhkan.

(2) Walau apa pun subseksyen (1), segala perundangan subsidiari yang dibuat di bawah atau mengikut Akta yang dimansuhkan hendaklah, setakat yang ia tidak tak konsisten dengan Akta ini, terus berkuatkuasa sehingga diubahsuaikan, dibatalkan atau digantikan oleh Akta ini.

24. (1) Pemansuhan di bawah seksyen 23 atau apa-apa yang terkandung dalam Akta ini tidak boleh menyentuh liabiliti mana-mana orang untuk dihukum atau didakwa kerana kesalahan yang dilakukan di bawah Akta yang dimansuhkan itu sebelum mula berkuatkuasanya Akta ini atau menyentuh apa-apa prosiding yang telah dibawa sebelum mula berkuatkuasanya Akta ini berkenaan dengan kesalahan itu.

Penerusan prosiding jenayah dan sivil.

(2) Apa-apa prosiding, sama ada sivil atau jenayah, atau kausa tindakan yang belum selesai atau yang sedia ada sebelum sahaja tarikh peletakhakan oleh atau terhadap Institut atau mana-mana orang yang bertindak bagi pihaknya boleh diteruskan atau dimulakan oleh atau terhadap syarikat pengganti seolah-olah prosiding itu telah dimulakan oleh atau terhadap Institut atau orang itu jika Akta ini tidak diluluskan:

Dengan syarat bahawa jika prosiding itu berhubungan dengan perkara yang berkaitan dengan apa-apa perjanjian akreditasi, prosiding itu hendaklah diteruskan atau dimulakan oleh atau terhadap Kerajaan.

(3) Apa-apa rayuan yang dibawa atau apa-apa kebenaran untuk merayu yang dipohon pada atau selepas tarikh peletakhakan terhadap sesuatu keputusan yang diberikan sebelum tarikh itu dalam apa-apa prosiding undang-undang yang dalamnya Institut menjadi satu pihak boleh dibawa oleh atau terhadap syarikat pengganti:

Dengan syarat bahawa jika rayuan itu berhubungan dengan perkara yang berkaitan dengan apa-apa perjanjian akreditasi, maka rayuan itu hendaklah dibawa oleh atau terhadap Kerajaan.

25. (1) Semua penentuan yang diisytiharkan sebagai penentuan standard di bawah seksyen 28 Akta Institut Standard dan Penyelidikan Perindustrian Malaysia (Perbadanan) 1975 atau yang menurut kuasa seksyen 49 Akta tersebut terus wujud sebagai penentuan standard yang diisytiharkan di bawah seksyen 28 dan yang wujud sebagai penentuan standard sebelum sahaja mula

Kecualian bagi penentuan, tanda dan lesen. Akta 157

berkuatkuasanya Akta ini hendaklah terus wujud sebagai penentuan standard yang diisytiharkan di bawah seksyen 15 Akta ini sehingga ditarik balik di bawah seksyen itu.

(2) Semua tanda yang didaftarkan sebagai cap dagangan perakuan menurut kuasa seksyen 29 Akta tersebut atau yang disifatkan telah didaftarkan di bawah seksyen 49 Akta tersebut dan tetap terdaftar sedemikian sebelum sahaja mula berkuatkuasanya Akta ini hendaklah terus tetap terdaftar.

(3) Semua lesen untuk menggunakan tanda standard yang diberikan di bawah seksyen 30 Akta tersebut atau yang wujud menurut kuasa subseksyen 49(3) Akta tersebut dan yang wujud sebelum sahaja mula berkuatkuasanya Akta ini adalah tetap sah sehingga lesen itu habis tempoh atau dibatalkan di bawah Akta ini.

Pencegahan
anomali.

26. (1) Jika timbul apa-apa kesulitan berkaitan dengan peruntukan peralihan yang terkandung dalam Bahagian ini, Menteri boleh, tertakluk kepada subseksyen (2), dengan perintah membuat apa-apa ubahsuaian dalamnya sebagaimana yang didapatinya perlu bagi mencegah anomali.

(2) Menteri tidak boleh menjalankan kuasa yang diberikan oleh subseksyen (1) selepas habis tempoh dua tahun dari mula berkuatkuasanya Akta ini.

HURAIAN

Rang Undang-Undang ini bertujuan membuat peruntukan baru dalam undang-undang yang berhubungan dengan standard dan perkara berkaitan yang lain. Rang Undang-Undang ini juga bertujuan mengadakan peruntukan bagi peletakhakan harta, hak dan liabiliti Institut Standard dan Penyelidikan Perindustrian Malaysia ("Institut") pada suatu syarikat pengganti.

2. Bahagian I Rang Undang-Undang mengandungi perkara permulaan.

Fasal 1 memperkatakan tajuk ringkas, pemakaian dan mula berkuatkuasa. *Fasal 1* juga bertujuan membenarkan Menteri menetapkan tarikh yang berlainan bagi mula berkuatkuasanya peruntukan yang berlainan dalam Rang Undang-Undang ini.

Fasal 2 bertujuan mentakrifkan perkataan dan ungkapan tertentu yang digunakan dalam Rang Undang-Undang.

3. Bahagian II memperkatakan peletakhakan harta, dsb., pada syarikat pengganti.

Fasal 3 membolehkan Menteri menetapkan tarikh peletakhakan yang menurutnya segala hak, liabiliti dan fungsi Institut akan berpindah kepada dan terletak pada syarikat pengganti.

Fasal 4 bertujuan menghendaki syarikat pengganti menerbitkan apa-apa sekuritanya kepada Menteri Kewangan.

Fasal 5 bertujuan memperuntukkan bagi penerbitan selanjutnya syer syarikat pengganti.

Fasal 6 bertujuan menghendaki syarikat pengganti menerima ke dalam perkhidmatannya anggota kakitangan Institut yang telah memilih untuk berkhidmat sebagai pekerja syarikat pengganti.

Fasal 7 bertujuan membolehkan Menteri Kewangan memohon beli atau memperoleh semua syer dalam syarikat pengganti.

Fasal 8 bertujuan melarang penjualan, pelupusan dan pengumpulan syer dalam syarikat pengganti yang dipegang oleh Menteri Kewangan.

4. Bahagian III memperkatakan fungsi, kuasa dan kewajipan Ketua Pengarah Jabatan Standard.

Fasal 9 memperkatakan perlantikan seorang pegawai awam sebagai Ketua Pengarah Jabatan Standard.

Fasal 10 memperkatakan kewajipan dan fungsi Ketua Pengarah.

Fasal 11 bertujuan membolehkan Ketua Pengarah mewakilkan mana-mana kewajipan atau fungsinya di bawah Rang Undang-Undang.

Fasal 12 memberi Menteri kuasa memberikan arahan kepada Ketua Pengarah yang tidak tak konsisten dengan peruntukan Rang Undang-Undang dan Ketua Pengarah mestilah melaksanakan arahan itu.

5. Bahagian IV memperkatakan penubuhan Majlis Standard dan Akreditasi.

Fasal 13 memperkatakan penubuhan Majlis dan menetapkan fungsi Majlis.

Fasal 14 bertujuan membenarkan Majlis menubuhkan jawatankuasa-jawatankuasa untuk menunaikan mana-mana fungsi dan kewajipannya dengan kelulusan Menteri terlebih dahulu.

6. Bahagian V memperkatakan standard dan perkara-perkara yang berkaitan.

Fasal 15 membolehkan Menteri mengisytiharkan, melalui pemberitahuan dalam *Warta*, mana-mana penentuan yang telah diterima pakai sebagai penentuan standard atau penentuan standard sementara.

Fasal 16 memperkatakan pengakreditasi dan pendaftaran organisasi dan orang oleh Ketua Pengarah Jabatan Standard.

Fasal 17 bertujuan melarang sesuatu kumpulan orang, diperbadankan atau selainnya, daripada menggunakan perkataan "Standard Malaysia" dalam namanya.

Fasal 18 memperkatakan kesalahan pelbagai.

Fasal 19 memperkatakan kesalahan yang dilakukan oleh pertubuhan perbadanan.

Fasal 20 bertujuan membolehkan ciri apa-apa komoditi, proses, amalan atau perkhidmatan ditetapkan atau ditentukan dengan merujuk kepada penentuan standard.

Fasal 21 memperkatakan sebutan dan bukti penentuan.

7. Bahagian VI memperkatakan peruntukan am.

Fasal 22 memperkatakan kuasa Menteri membuat peraturan-peraturan bagi melaksanakan maksud Rang Undang-Undang.

8. Bahagian VII memperkatakan peruntukan pemansuhan dan peralihan.

Fasal 23 mengandungi peruntukan pemansuhan dan kecualian.

Fasal 24 memperkatakan penerusan prosiding jenayah dan sivil.

Fasal 25 mengandungi peruntukan berhubungan dengan kecualian bagi penentuan, tanda dan lesen.

Fasal 26 mengandungi peruntukan bagi mencegah anomali yang berbangkit daripada peruntukan peralihan.

IMPLIKASI KEWANGAN

Rang Undang-Undang ini akan melibatkan Kerajaan dalam perbelanjaan wang tambahan yang amaunnya belum dapat ditentukan sekarang ini. [PN. (U²) 1468.]